



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 843, Datë 27.10.2021

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË CREDIT AGRICOLE SRBIJA A.D NOVI SAD NGA SHOQËRIA RAIFFEISEN BANKA A.D.”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Znj. Rezana KONOMI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 27.10.2021, shqyrtoi çështjen me:

Objekti: Autorizimi i përqendrimit të realizuar nëpërmjet përfhtimit të kontrollit të shoqërisë Credit Agricole Srbija a.d Novi Sad nga shoqëria Raiffeisen Banka A.D.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfhtimit të kontrollit të shoqërisë Credit Agricole Srbija a.d Novi Sad nga shoqëria Raiffeisen Banka A.D.

VËREN SE:

Transaksioni dhe procedura

Pranë Autoritetit të Konkurrencës, është depozituar njoftimi mbi përfhtimin e kontrollit të shoqërisë Credit Agricole Srbija a.d Novi Sad nga shoqëria Raiffeisen Banka A.D.

Referuar dokumentit “Marrëveshje e shitblerjes në lidhje me aksionet në kapitalin e Credit Agricole Srbija a.d Novi Sad” të lidhur më datë 5 gusht 2021, palët janë:

Pala blerëse: *Raiffeisen Banka A.D*, shoqëri aksionare, me seli Beograd, me objekt aktiviteti: ndërmjetësim tjetër monetar. Raiffeisen Banka A.D është pjesë e Raiffeisen Bank International

Group, i cili ofron shërbime bankare dhe financiare universale përmes disa filialeve në Evropën Qendrore dhe Lindore.

Raiffeisen Bank International Group është aktiv në Shqipëri, ku operon përmes filialeve të tij, Raiffeisen Bank Albania SHA dhe Raiffeisen Leasing SHA

Raiffeisen Bank Albania SHA, është një shoqëri aksionare, me objekt aktiviteti: ushtrimin e veprimtarisë bankare dhe financiare si dhe çdo veprimtari tjetër të lidhur me to, në përputhje me legjislacionin në fuqi dhe në përputhje me veprimtarinë e saj, sipas licencës bankare të lëshuar nga Banka e Shqipërisë. Raiffeisen Bank Albania SHA është një nga bankat kryesore në tregun e shërbimeve bankare në Shqipëri.

Raiffeisen Leasing SHA është një shoqëri aksionare, me objekt aktiviteti: veprimtari qeraje financiare, kredidhënie, etj. Raiffeisen Leasing SH.A është shoqëria më e madhe në tregun e shërbimeve të qerasë financiare (leasing) në vend.

Pala shitëse: *Credit Agricole S.A.*, është një shoqëri aksionare, e themeluar sipas legjislacionit Francez, me aktivitet të kryer: koordinimi dhe kontrolli i institucioneve të kreditit, të centralizimit reciprok të kredisë bujqësore dhe menaxhimin e tepricës së depozitave dhe kursimeve të bankave rajonale të financimit reciprok të Credit Agricole.

Target: *Credit Agricole Srbija a.d Novi Sad*, është një shoqëri aksionare, e regjistruar sipas legjislacionit të Serbisë, me objekt aktiviteti: Operim në sektorin financiar dhe bankar dhe ofrimi shërbimeve bankare, sipas ligjeve të Serbisë. Credit Agricole Srbija a.d Novi Sad zotëron tërësisht filialin CA Leasing Srbija d.o.o, Beograd.

CA Leasing Srbija d.o.o, Beograd, është një shoqëri me përgjegjësi të kufizuar, sipas legjislacionit të Serbisë, me objekt aktiviteti: Operimin në sektorin e leasing sipas ligjeve të Serbisë.

Shoqëria Credit Agricole S.A dhe asnjë prej filialeve të saj nuk operon dhe nuk është aktive në Shqipëri.

Ndërmjet shoqërisë Credit Agricole S.A dhe shoqërisë Raiffeisen Banka A.D. është nënshkruar dokumenti “Marrëveshje e shitblerjes në lidhje me aksionet në kapitalin e Credit Agricole Srbija a.d Novi Sad”, nëpërmjet të cilës, shoqëria Raiffeisen Banka A.D do të bëhet zotërues i 100% i aksioneve të zakonshme tek shoqëria Credit Agricole Srbija a.d Novi Sad dhe indirekt tek filiali i saj, shoqërinë CA Leasing Srbija d.o.o, Beograd.

Transaksioni i propozuar konsiston në përfitim të kontrollit të drejtpërdrejtë të shoqërisë Credit Agricole Srbija a.d Novi Sad dhe kontrollit indirekt të shoqërisë CA Leasing Srbija d.o.o, Beograd nga shoqëria Raiffeisen Banka A.D, transaksion i cili plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Vlerësimi i konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit mund të konsiderohet tregu i shërbimeve bankare, por duke qenë se

transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar është përftimi i kontrollit të shoqërisë Credit Agricole Srbija a.d. Novi Sad nga shoqëria Raiffeisen Bank A.D, pjesë e Raiffeisen Bank International Group, i cili ofron shërbime bankare dhe financiare universale përmes filialeve në Evropën Qendrore dhe Lindore.

Raiffeisen Bank International Group është aktive në Shqipëri në tregun e shërbimeve bankare nëpërmjet Raiffeisen Bank Albania SHA dhe tregun e qerasë financiare (leasing) nëpërmjet Raiffeisen Leasing SHA.

Credit Agricole Srbija a.d. Novi Sad nuk ushtron aktivitetet dhe nuk realizon të ardhura në Republikën e Shqipërisë

Përqendrimi nuk do të krijojë mbivendosje të tregjeve ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet përfimit të kontrollit të shoqërisë Credit Agricole Srbija a.d Novi Sad nga shoqëria Raiffeisen Banka A.D.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS